

## **Memorandwm Esboniadol ar gyfer Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021**

Lluniwyd y Memorandwm Esboniadol hwn gan Adran Llywodraeth Leol Llywodraeth Cymru ac fe'i gosodir gerbron Senedd Cymru ar y cyd â'r Gorchmynion uchod ac yn unol â Rheol Sefydlog 27.1.

### **Datganiad y Gweinidog**

Yn fy marn i, mae'r Memorandwm Esboniadol hwn yn rhoi darlun teg a rhesymol o effaith ddisgwyliedig Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021.

**Julie James AS**  
**Y Gweinidog Tai a Llywodraeth Leol**

23 Chwefror 2021

## 1. Disgrifiad

Mae Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021 yn addasu Deddf Trafnidiaeth 2000 i ddarparu ar gyfer Cyd-bwyllgorau Corfforedig a sefydlir gan reoliadau a wneir o dan Ran 5 o Ddeddf Llywodraeth Leol ac Etholiadau (Cymru) 2021, y rhoddwyd iddynt y swyddogaeth o ddatblygu polisiau o dan adran 108 o Ddeddf Trafnidiaeth 2000

Daw'r darpariaethau hynny i rym ar 22 Chwefror 2022.

## 2. Materion sydd o ddiddordeb arbennig i'r Pwyllgor Cydraddoldeb, Llywodraeth Leol a Chymunedau

Ni nodwyd unrhyw faterion penodol.

## 3. Cefndir Deddfwriaethol

Mae'r pwerau sy'n galluogi i'r Rheoliadau hyn gael eu gwneud wedi'u cynnwys yn adrannau 83(2), 84 a 174 o Ddeddf Llywodraeth Leol ac Etholiadau (Cymru) 2021.

Mae adran 83(2) yn rhoi pŵer i Weinidogion Cymru wneud darpariaeth atodol, gysylltiedig, ganlyniadol, drosiannol, ddarfodol neu arbed sy'n gymwys mewn perthynas ag—

- (a) pob cyd-bwyllgor corfforedig;
- (b) cyd-bwyllgor corfforedig penodol;
- (c) disgrifiad penodol o'r cyd-bwyllgor corfforedig.

Mae adran 84 yn rhoi pŵer i Weinidogion Cymru wneud darpariaeth mewn cysylltiad â rhan 5 o Ddeddf Llywodraeth Leol ac Etholiadau (Cymru) 2021 sy'n diwygio, yn addasu, yn cymhwyso (gydag addasiadau neu hebddynt) neu'n datgymhwyso unrhyw ddeddfiad.

Mae adran 174 yn ei gwneud yn ofynnol i'r Rheoliadau hyn fod yn ddarostyngedig i'r weithdrefn penderfyniad cadarnhaol yn y Senedd.

Yn amodol ar gymeradwyaeth y Senedd, bydd y Gorchmynion yn cael eu gwneud gan y Gweinidog Tai a Llywodraeth Leol ar 17 Mawrth 2022 ac yn dod i rym ar 28 Chwefror 2022. Mae'r dyddiad dod i rym yn cael ei ohirio er mwyn sicrhau ei fod yn cyd-fynd â dyddiad cychwyn cyntaf y swyddogaeth o ddatblygu polisiau o dan adran 108(1)(a) a (2A)(a) o Ran 2 o Ddeddf Trafnidiaeth 2000 o dan Reoliad 13 o Reoliadau Cyd-bwyllgor Corfforedig y De-ddwyrain 2021.

## 4. Diben y ddeddfwriaeth a'r effaith y bwriedir iddi ei chael

Mae Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021 ("y rheoliadau trafndiaeth") yn addasu Deddf Trafnidiaeth 2000 mewn perthynas â Chyd-bwyllgorau Corfforedig a sefydlir o dan Ran 5 o Ddeddf Llywodraeth Leol ac Etholiadau (Cymru) 2021 pan fo swyddogaethau datblygu polisiau o dan adran 108 o Ddeddf Trafnidiaeth 2000 wedi'u rhoi i'r Cyd-bwyllgorau Corfforedig hynny.

Mae Cyd-bwyllgorau Corfforedig yn gyrrff corfforedig, a sefydlir drwy reoliadau, ac maent yn cynnwys y prif gynghorau hynny yng Nghymru a bennir yn y rheoliadau sefydlu. Mewn rhai amgylchiadau, mae awdurdodau Parciau Cenedlaethol yng Nghymru hefyd wedi'u cynnwys mewn Cyd-bwyllgor Corfforedig; lle bo hyn yn wir, bydd hyn hefyd yn cael ei nodi yn rheoliadau perthnasol sefydlu'r Cyd-bwyllgor Corfforedig.

Mae Rheoliadau Cyd-bwyllgorau Corfforedig y Canolbarth 2021, Rheoliadau Cyd-bwyllgor Corfforedig y Gogledd 2021, Rheoliadau Cyd-bwyllgor Corfforedig y De-ddwyrain 2021 a Rheoliadau Cyd-bwyllgor Corfforedig y De-orllewin 2021 ("y Rheoliadau Sefydlu Cyd-bwyllgorau Corfforedig") yn sefydlu 4 Cyd-bwyllgor Corfforedig rhanbarthol yng Nghymru.

Mae Rheoliadau Sefydlu'r Cyd-bwyllgorau Corfforedig yn darparu bod yn rhaid i'r Cyd-bwyllgorau Corfforedig hynny arfer swyddogaethau datblygu polisïau o dan adran 108 o Ddeddf Trafnidiaeth 2000.

Mae'r rheoliadau trafndiaeth yn darparu ar gyfer yr addasiadau angenrheidiol i Ddeddf Trafnidiaeth 2000.

Mae'r rheoliadau trafndiaeth:

- Yn addasu adran 108 o Ddeddf Trafnidiaeth 2000 fel bod yn rhaid i Gyd-bwyllgor Corfforedig y rhoddir y swyddogaethau iddo ddatblygu polisïau ar gyfer hyrwyddo ac annog trafndiaeth ddiogel, integredig, effeithlon ac economaidd i mewn ac allan o'i ardal ac oddi mewn iddi; ac yn darparu bod yn rhaid i bob awdurdod trafndiaeth lleol sy'n dod o fewn ardal y Cyd-bwyllgor Corfforedig weithredu'r polisïau a ddatblygwyd gan y Cyd-bwyllgor Corfforedig.
- Yn addasu adran 108 o Ddeddf Trafnidiaeth 2000 fel bod yn rhaid i Gyd-bwyllgor Corfforedig hefyd ddatblygu polisïau i'r awdurdodau trafndiaeth lleol yn ei ardal weithredu Strategaeth Drafnidiaeth Cymru a bod yn rhaid i bob awdurdod trafndiaeth lleol sy'n dod o fewn ardal y Cyd-bwyllgor Corfforedig weithredu'r polisïau hyn.
- Yn addasu adran 108 o Ddeddf Trafnidiaeth 2000 fel bod yn rhaid i Gyd-bwyllgor Corfforedig baratoi cynllun trafndiaeth rhanbarthol sy'n cynnwys ei bolisïau.
- Yn addasu adran 108 o Ddeddf Trafnidiaeth 2000 i ddarparu ar gyfer dehongli'r Cyd-bwyllgor Corfforedig ac ardal Cyd-bwyllgor Corfforedig yn briodol.
- Yn addasu adran 109A o Ddeddf Trafnidiaeth 2000 i ddarparu ar gyfer cymeradwyo cynllun trafndiaeth rhanbarthol a baratowyd gan Gyd-bwyllgor Corfforedig.
- Yn addasu adran 109B o Ddeddf Trafnidiaeth 2000 i ddarparu ar gyfer adolygu, disodli, cyhoeddi ac arolygu cynllun trafndiaeth rhanbarthol a baratowyd gan Gyd-bwyllgor Corfforedig.
- Yn addasu adran 112 o Ddeddf Trafnidiaeth 2000 i ddarparu bod yn rhaid i Gyd-bwyllgor Corfforedig roi sylw dyledus i ganllawiau a gyhoeddir gan Weinidogion Cymru ynghylch cynnwys, paratoi, newid, disodli a chyhoeddi ei gynllun trafndiaeth rhanbarthol.

- Yn addasu adran 113B o Ddeddf Trafnidiaeth 2000 i ddarparu y caiff Gweinidogion roi cyfarwyddiadau i Gyd-bwyllgor Corfforedig neu awdurdod trafndiaeth lleol ynglŷn a'r modd y byddant yn cyflawni eu swyddogaethau o dan y darpariaethau perthnasol yn y rheoliadau trafndiaeth.

## 5. Ymgynghori

Cynhaliwyd ymgynghoriad ffurfiol ar Reoliadau Cyd-bwyllgor Corfforedig y Canolbarth 2021, Rheoliadau Cyd-bwyllgorau Corfforedig y Gogledd 2021, Rheoliadau Cyd-bwyllgor Corfforedig y De-ddwyrain 2021 a Rheoliadau Cyd-bwyllgor Corfforedig y De-orllewin 2021 ("Rheoliadau Sefydlu'r Cyd-bwyllgorau Corfforedig") rhwng 12 Hydref 2020 a 4 Ionawr 2021. Roedd Rheoliadau Sefydlu'r Cyd-bwyllgorau Corfforedig yn cynnwys darpariaeth i roi i'r Cyd-bwyllgorau Corfforedig hynny swyddogaeth datblygu polisiâu o dan adran 108(1)(a) a 2(A)(a) o Ran 2 o Ddeddf Trafnidiaeth 2000. Roedd Rheoliadau Sefydlu'r Cyd-bwyllgorau Corfforedig hefyd yn cynnwys yr addasiadau i Ddeddf Trafnidiaeth 2000 a gynhwysir yn Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021 y mae'r Memorandwm Esboniadol hwn yn ymwneud â hwy. Ni dderbyniwyd unrhyw wrthwynebiadau i'r darpariaethau fel y'u drafftwyd.

Dylid nodi bod y darpariaethau yn Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021 wedi'u cynnwys i ddechrau fel atodlenni ym mhob un o'r Rheoliadau Sefydlu Cyd-bwyllgorau Corfforedig uchod. Mabwysiadwyd y dull hwn ar gyfer yr ymgynghoriad er mwyn sicrhau eglurder bwriad pob un o'r Cyd-bwyllgorau Corfforedig sy'n cael eu sefydlu. Nid yw'n briodol nac yn angenrheidiol i Reoliadau Sefydlu'r Cyd-bwyllgorau Corfforedig ddarparu ar gyfer yr addasiadau angenrheidiol i Ddeddf Trafnidiaeth 2010.

## 6. Asesiad Effaith Rheoleiddiol

Paratowyd Asesiad Effaith Rheoleiddiol i gyd-fynd â Rheoliadau Cyd-bwyllgor Corfforedig y Canolbarth 2021, Rheoliadau Cyd-bwyllgor Corfforedig y Gogledd 2021, Rheoliadau Cyd-bwyllgor Corfforedig y De-ddwyrain 2021 a Rheoliadau Cyd-bwyllgor Corfforedig y De-orllewin 2021. Asesodd yr Asesiad Effaith Rheoleiddiol y costau a'r manteision posibl sy'n gysylltiedig â sefydlu'r Cyd-bwyllgorau Corfforedig drwy reoliadau. Wrth asesu'r costau a'r manteision posibl, ystyriodd yr Asesiad Effaith Rheoleiddiol yn benodol y costau a'r manteision sy'n gysylltiedig ag arfer y swyddogaethau y mae Rheoliadau Cyd-bwyllgorau Corfforedig (Swyddogaethau Trafnidiaeth) (Cymru) 2021 yn ymwneud â hwy.

Mae copi o'r Asesiad Effaith Rheoleiddiol sy'n cyd-fynd â Rheoliadau Cyd-bwyllgor Corfforedig y Canolbarth (Cymru) 2021, Rheoliadau Cyd-bwyllgorau Corfforedig y Gogledd (Cymru) 2021, Rheoliadau Cyd-bwyllgorau Corfforedig y De-ddwyrain (Cymru) 2021 a Rheoliadau Cyd-bwyllgor Corfforedig y De-orllewin (Cymru) 2021 ar gael fel rhan o'r dogfennau perthnasol sy'n cyd-fynd â'r rheoliadau hynny:

<https://senedd.cymru/media/asppuikv/sub-ld14134-em-w.pdf>.